

小謨觴館詩文集

小謨觴館文集卷第三

鎮洋 彭兆蓀 湘涵

書

答汾陽李洪九進士書

月日某白離索以來南北僻左歲月易得忽復五稔虛想之
積過於陵阜辛歲伍伯西來榮問遠貢發函信紙情波徐興
艸兮伴侶難登再少之年拓跋關河重觸三生之夢彼汾之
曲有美一人環誦周諱益增懸遲卽欲肇牋裁報而入洛之
書附犬未果遡風之翼北鴻已翔吳天一角鴈門萬仞雨絕
雲乖庭虛情滿足下峻偉人望奮飛天衢以三十之年登進
士之第燕壘泥成龍鬚功奏雖木天未上而花縣將封已償
立鵠之勞可免退鵠之歎乃來書愴恨氣涌如山身登兜率

陀天目鼈真靈位業正如陶侃排雲歷八重而覬一裴優吐
霧見五里而嗟三既乖樂道之心亦違知止之義不宜大雅
有此褊衷故畧陳其愚惟君子簪焉夫慕學士以頭廳詆縣
令爲畜道此晉唐之陋習非儒者之宅心但謂清職蠹官仙
凡路別不知文章政事報稱道同揆厥昧由乃根立志彼自
佔畢幼學考校中年卽視藝圃爲榮梯擁書林作利網朝光
夕露秋蟋春鷗欲得任公之大魚必以孔書爲香餌言泉沛
於腕下祿火然於寸心無食熊之肥有望羊之瘦一旦綠衣
通籍紅研宣豪旣出泥而入脂貴依天以宅照志不逾乎食
肉而禁鬻尤甘樂止在乎尋春而苑花獨麗是以得如甘醴
失若秋荼枯菀攻心悲愉易狀其實蓬山芸閣蓋延良直之
材東觀西清豈侈名銜之美詞頭易作史筆難操君子懷稱

職之憂俗目競登仙之鑑不過身依香案超千佛而名尊路
近紅雲領羣真而澤渥防風之粥五合三辰之酒萬車杏葉
飛龍蓬池斫鱠稱榮炫異如是而已所謂本舛者末乖源淆
者委濁可爲齒冷無足涎流者也足下書味覃心道腴澤體
卽區區者子界於我何加心搖搖如旌懸詬天已晚勿忘盱
豫之悔自同垂翼之傷更有片言爲君前箸夫窮經致用事
豈一端學古入官任隆百里方今八埏粢晏七曜遵度足下
美除不遠墨綬將膺正宜乘此泰和抒其夙抱得尺得寸著
手皆春爲雲爲龍隨方作雨拔一本之薤賢於成檮杌溥十
緊之潤賢於志河渠赤望之治不必白樸之傳也寶書之貴
不必縣譜之賤也一爲備位之枝官一爲宅生之長相循良
文苑何去何從是又哲人所當審擇已若僕者拙計成鳩雛

聲負鳳江南草長瀼西田蕪遙盼管州之山追惟承蓋之樂
塞垣風黑官燭窗紅過風渺於前林往夢斷於旣寤自分爨
灰耐冷柯竹誰調貧爲轉轍之魚寒作依簷之雀萊蕪金畔
塵垢一囊臺駘廟旁晨星三五地遐心邇苦異岑同用敢肆
其狂談幸勿屏爲怪侶士各有志任鄧禹之笑人子欲無言
恃惠子之知我

再答李洪九書

某再拜辱來書教以專力時文先務進取博雅好古勿以閒
之是何愛我之深而知我之淺也三復循省不知所裁故又
貢厥迂言申其愚慄惟足下圖之側聞正文字者惟學林通
古今者曰選士義歸一轍道匪兩歧在漢諸生試家法練虛
實於端門光祿舉茂才辨異能於公府皆以廣延鴻達非俾

安生羽毛是故奏書家令不聞衣鉢之傳上第江都別乏揣摩之術以今况昔時異勢殊然明試求賢心同籲俊有司發策志在魁能惟偶體之時文乃一王之定制苟其探源星海搜柢珠林體選舉之本懷舊經生之絕業則將伐山刊木登本捐枝採擷春華鬱爲秋實幸而珠能照乘璞不返荆雖此時文特爲羔雁眷言小技無妨弁髦然根茂則實昌膏加則光遠卽或潤色鴻業別使斧藻隆平上無愧得人下無忝稽古此爲上策抑有命焉不則鏟采埋光韜精隱曜玉在匱而無色金委沙而不祥亦將砥業名山寄身汙簡食盡神仙之字脈望千秋遊思竹素之園乾螢不老此爲中策窮士以之凡此二端要由底蘊植基不厚則進退惟谷培根旣固則隱顯皆榮非迂誕之浮詞實報施之不爽也若夫弋獲希心好

官銅志操僞法以求仙籙奉豚蹄而祝篝車鷄毛三寸兔園
一冊黃花誤讀孤竹不知問太傅之爲誰辨孟堅之非固我
將愧而入地彼猶懵然坐雲是卽秋賦濫登春關竊吹魚目
可混瓦金易鳴飾金章於走肉被朱紫於行尸生同羣項之
烏歿作一邱之貉古今袞袞不乏其儕得尙非榮失而何冀
此爲下策無用三思足下憫我穠雲慮其鏽羽以讀書爲紓
軫開捷徑於終南舍南面之百城屏油素之四尺欲以一卷
脆弱作我三冬課程是使駿愁道遠旁求縮地之方鳳苦天
高降學搶榆之勢航斷港而求通塞天河而丐潤見愛則切
爲謀已疏又何慎也不寧惟是夫來書戒以驚博則視僕爲
汲古之人勉以制科則視僕爲忘名之輩揆之下走均有未
符某束髮從師挽鬚承訓裹白袍而踏省燒樺燭而呈藝危

得危失十稔於茲初未嘗仰屋著書鑿坏遁跡侈葩華之萍
流薄帖括而不事也乃足下遽以爲奇駁而陳戒良由三堆
塞僻巾字峯寒士習麻沙戶安彫勅覆元文於醬瓿驚南華
爲僻書見有物識漢唐間嫋辭賦遂乃魚愕鷄睨鷗視鷹瞵
居嫫母之邨庸姿妖麗入豚牢之廐凡馬空羣究之如某下
材何足讐指是又足下之過慮也且也十擲輒鞬非關博拙
一呼成雉豈曰人功苟學海之旣探卽命官之是繫足下義
心清尙好學深思茲之出手得盧亦是投壺中雋本非襲取
別有旁門而諄諄以此相規者得毋金門旣入遂謂秘箭能
探幸登衆迷之津謬詡獨醒之筏則是寄奴得采屬劉毅以
呼梟李蔡封侯勸北平之學射用情良厚其如外何夫天幸
數奇命途不一盛名厚實彼此難兼祗當力稽求豐不必披

榛覓路三千里外言盡於斯至如聖賢立心豪傑自命以科舉爲一厄甘墨水之三升昌黎應科目之書紫陽戒門人之語前型具在不復更論足下聞之益當河漢子寧以他規我竊自比於鄭僑也

答郭祥伯書

走之欽遲足下素矣朋往欵接輒盛口不置承風遙羨未面自親顧墜雨秋蒂邈焉莫同佇軸深衷形留心往豈意君子之光猥照幽寂輕苔魚網爛然先賚通素衿假華譽誦復紙縗彌用願言走固庸性人辱二三諸賢相架累此耆卿等耳羊公不舞之鶴自知夙明惟三益之好政復深摯寄荆以來跡同仲宣良書獨擁善談無析何幸清顏密邇雙情交映是有因緣非浮寄也郡閣蕭閨閉置類車中新婦又素抱王微

不好詣人之癖悠爾來儀仍望諸足下昔就雲訪休源胡毋過孝孫少府不聞見阻護軍亦自欣曠何嫌何疑而尼止車轍况徵集非偶脫搏沙散去又隔兩塵豈不惜哉佇慰渴瓊想無金玉鶴望圃蓋以代萱蘇

與李石帆書

甲歲廣柳東歸辱大君子閔憐孤露鑑轉兼金麻衣就道銜戢何極竭來歲星四周景瞻高躅邈焉千里秋間復枉赤牘郁雲絢施垂露在手又不啻承下風接清揚也閣下巖巖清峙湛若神君濯纓清流牽絲壁立而又大雅宏達游思竹素仲宣公幹翔集左右黃初正始之音不墜於譙國扶輪承蓋千載輝映某孱然立骨耳少匪通惠長益區晉虛慕終軍豹鼠之辨實無正平鸚鵡之能頻歲支離淳更多故學殖益落

饑來驅人幸含谿先生振拔于垂絕之時厚施於不報之域
謬委授經謀其仲嗣三年以來送抱推襟有如一日顧影慙
仄惟有謾台戟寢蕭閒藉得少理舊業號寒之蟲時復一呻
濡墨既多頗比筭束恨不獲一陳執事爲下走指迷殊恨恨
爾襄樊蟻聚以時勢揆之正如捧海澆螢芟夷蘊崇蹠足可
待惟是閣下地交嵩少飛檄星流團白芳之軍遮黑山之衆
不無蔓頓仰願珍宜欵襟旣遼覩縷莫罄時有南風更冀良
訊不宣

答徐企范書

日者金闈接草快遂欽遲元譚清諭移晷忘倦加以推襟辱
聯僑札攀嵇慕呂獲副雅懷館宇淹延喜樂無量嗣偕子白
友之歷探林屋莫釐諸勝梯巒抗雲落落陶陶山情放曠惜

足下小極失此嘉游而僕亦以登頓過勞心疾遽作形憊神
茹煙駕雲裝索然遙返雖寒山騰吹較勝漳濱然墜雨飛蓬
松寒鶴怨其爲乖情一也比知履絰安豫君子惟宜別來藥
養兼施稍稍起立鼠鬚側理色動思御忽拜箋繪眷言記注
推獎逾分恧不自安夫石髓易凝芝田難駐此關福命非曰
人爲况某素昧攝生節宣無序今之萎脣勢有由然足下乃
以筆鐫墨剗山靈見忌欲援然犀之例目我太真俾弱子辱
夫得假善名蓋其羸劣愛我則摯無乃過乎秋氣深矣急欲
辦嚴龍旛初旬定過破楚門一申爻繫瓊什草草酬次都未
愜懷惟摘瑕教之幸甚香溪一曲吾家數峰重過有期鶴望

計日

與李刺史書

竊惟俠牀設披孝子所以比化傾褚輶馬仁人所以濟藉是
以蔡順號犧崇遣車而助曼卿謀穸堯夫付舟而歸王少
林鬻金以殯書生劉長史領橐而葬孤姥按鄉爲邱壟拔雲
居之義聲代子墓賈人目津長爲君子是皆陽施長世陰德
遐紀與物爲春幽顯咸暢古則然矣今獨無其人乎某以萊
孱辱承盼飾近自袁浦弭櫟姑胥實欲謀丙舍以掩親相庚
泥而卜挑淮陰營地庶可從軍士行尋山方能應辟人之情
也義之宜也惟是鮑防寢孤朝霞貧薄營庾郎廿七物之鮑
菜已竭餐錢植沙彌百什株之櫟松安求樹價况乎王畿陸
海畝號一金圖始居終山愁八字脫無赤仄誰讓紅簫且也
乞郭有道之碑亦須布幣會范巨卿之墓不廢留賓凡此飾
棺置霎之有待盧牟必非炊覓春蓬者所能陳掾握張悛守

冢人之表無當緝錢展周官墓大夫之文奚裨窆律仰惟閣
下德進如日義高於雲魏成子食祿千鍾十九在外宗元饒
助課一郡三千散租揚鍾離葉陽之仁風具罕樂景惠之心
行無居官官事有春風風人倘可假以濃陰蘇其卒葉分廉
泉一勺之水成寢邱三尺之封瞻北郭騷之單寒哀程俱羅
之力盡佳城鬱鬱得妥牛眠德海汪汪便同鼈戴豈非蜡人
掩骭亦王政之所先阮裕焚車笑濟人之已晚哉而說者謂
竭忠盡歡君子所惡予求子取將汝瑕疵甲歲歌虞殯路泛
賴扶輶已叨十笏之頒不應再三之瀆則是地士之危言非
人天之清尚夫博分以致衆者此夜行也施物而能忘者此
天布也樊南有云醫門投足永念倉公寶肆迴腸只期和氏
分梁沾瀝振古如斯是用干冒尊嚴忘其歎欵茲者休夫舉

鉢以待輶車辨域而臨圓石未立樵蘇可虞肺附增哀性靈
其惻閣下其有意乎拯水火者援之以手諒無嫌將伯之呼
爲浮屠者必合其尖敢復作發棠之請

與甯榕塢書

榕塢足下別來三年中疊枉手牘申以詩歌途遼勢阻報章
末由紓軫之情白水知狀春初得蔣司馬書驚聞止齋怛焉
殂化悼心失圖陔臉沾膝回念曩日撫塵之好一文一句必
其研讀亦莊亦元相與上下茅齋三楹近在城角黃葉尺許
積於風櫺燈涼酒溫書古談洽此景此人時復入夢猶望孤
蓬或轉散沙再搏豈意乖離便成永訣王微告弟之書巨卿
哭友之淚其爲哀痛寧有差哉欲作一文聊附哀誄詞繁緒
多憮所從始素車白馬旣隔於川塗楚些大招復懸於翰墨

拊膺負負呼譽何極惟思袁其述作授諸木工而所存不全
仍望足下此舉脫復可辦稍得不負宿心晚近文人貴名賤
實所謂貢五履二兩爻無聞正當以此君行誼文章爲學者
鍼砭耳某客吳門已越二稔謝章所入不足當卒歲之半長
卿禪鼻平仲楹書都爲易米之需漸逼生塵之患性復嬾拙
不好干人世態日諳益覺寡昧聲華以喧寂爲軒輊戚屬以
榮悴爲親疎倘訴南山之餓必致西華之辱此所以閉口匿
貧抗懷希古雖頗領而不悔者也新知比亦不乏要渺斷金
其僕僕懷刺門門買聲者無論已或有侈口經神高談漢聖
則又土苴辭賦滅棄風騷性情旣殊蹤跡亦闊至於韻語自
謂夙習然操翰者牛毛愜心者麌角羣絲寡和么弦獨張亦
彈不成聲矣課經之餘頗留意六朝偶體欲復俳俗歸諸古

音曾選百篇已付剞劂舊所作詩亦先刊二卷統俟藏事覓人寄呈體羸多病意興迥非昔時言念哲昆又弱一個文能傷命憂難永年旣悲逝者行自念也擲筆汎瀾奉報萬一別紙所具并希鑒裁

與吳韻皋書

一昨伏奉手畢垂示和章撐霆裂月接宏響於夔牙噴露吹霜挽瀆瀾於翰藻以咸池酬北里舉樸檄廁翹薪此真慧命所云溢目致歡而拊膺多愧也心路咫尺事阻山河浮雲色曉悵然魂越足下譚粹秉質貞亮挺姿通經爲高密之兒問絅走胡威之傳致能騷牢金石掀拔風雲變醻養瘠氣往轢古剗剗反僞鏡能照神大雅之材茂矣美矣竊念斯道久雜榛芳原其大端厥有五弊鄉曲環子章句鄙儒手未窮縉繩

目未營邱索終朝點綴不過人間小書分夜呻吟乃類筐篋
瑣語謬冀妙悟可棄筌蹠直謂別腸無關故實是謂庖厨不
修欲延大賓山木弗度徒詡良匠其弊一也任力耕耨縱心
丹鉛駕博適以溺心矜文遂致滅質徵名有同於點鬼比事
或等於補衲縷采繁辭貽譏疥駱翠綸桂餌轉笑失魚是曰
諫癡終慚妍手其弊二也汎均堂者怯浮海之航搶枋榆者
昧垂天之翼局趣轍下取媚一時粉黛飾壯士之容譎譎學
兒女之語畧涉宮體喧曹劉爲古拙習爲俳俗視齊梁作後
塵自乘高聰無涉文流其弊三也祖述襲哲戶祝前徽語必
黃初書刪唐後凡屬賦別卽云攜手河梁思工發端必曰大
江日夜百年萬里落日西風見哂藝林比之優孟襲貌遺神
其弊四也文章遇物成象各有體裁春日不必學歸藏江水

不能同大傳崩豁雷硠之句非所施於山林浹寥蕭瑟之音
難以登諸韶濩核量文質貴集衆長必据僧清而薄韓豪斥
謝巧而慕裴質執一隅之解忘萬端之變其弊五也五者沿
流更生三惑無邁古之志抱獵名之心濶扁一函希榮田竇
之里油素四尺獻業金張之門訛言入則色飛毀詞來則氣
涌圖分明甲互相詆謀魂魄一去同歸秋草此一惑也義絕
規諷感乏心靈題圖與宴之作累牘連篇介眉悼逝之言抗
塵走俗四聲豈縞綺之具六義非巫祝之倫返之寸衷了無
所涉去道益遠雖多奚爲此二惑也品貴自立詩歌亦然隆
赫譽望不皆振奇之賢沈落光耀非無英絕之士乃有魚貫
鳬躍附翼攀鱗誤習辟支之禪遂致橫流之酷此三惑也今
欲掃五弊之叢滋祛三惑之積俗爲百川障扶九服輪舍執

事外誰可語此哉歷下亭古濟南士多子舍納宜履候無爽
他日振策鳬繹停轡鵝城得復擊銅鉢圍籠爐白雪樓高錦
湖秋麗南音繼作當互唱乎黃塵東閣許窺諒弗施平行馬
心乎愛矣青鳥明之

與沈文起書

皋廡爲別嗣音久虛枕席勤功亮隨日積五十紙袁峻之課
八千章崔慤之書引首元亭何嘗不眷刊授兩漢想有端緒
班范之學宋凡數家文子天麟祇詳規制林鍼洪邁但標辭
華錢時筆記頗病空談王氏紀年間嫌佚脫至若楊大雅所
采擷深寧叟所證明體例各殊漏畧不免求其貫串全書刊
落謬誤泌靖而外三劉功多顧斗南一老繼作補遺其所考
訂乃轉贏於舊可知討論勝帙後勝譬於積薪看覈縹緲力

劬同夫掃葉足下遂能支若月之眼炳朝日之光衆著而外
別精覆審鈞稽朱墨踵王述之決疑揆剔豪芒倣吳縝之糾
謬豈非大小顏之諍臣章懷劉昭之畏友哉不朽之業良在
於斯斷手何時拭目以俟比聞小試被放咸相詫嘆僕固謂
無足異也秀才一科名實久舛漢若賈傳斯舉方膺魏有孔
昭尙悲不遇觀永明策文杜銓傳載其爲貴重蓋無等倫沿
至宋元以名青領流品日下偷薄相仍習至易之技爲雷同
之言瑟憊了解便稱都士學而籠誦卽冒雅材至於四子之
餘八比之外三史同於挂壁百家任其迷塗繆種流傳迄用
一律或有周流儒墨殫極邱墳將目之爲大愚甚或招夫醜
詆故黃小可以及格而魁碩不必中選鑽而不舍是煎水求
冰也以足下所業俛就有司大海納於牛跡裸壤耀以龍章

擇術旣乖淪棄復何惑乎敬勗光彩毋狃前修世有桓譚不
憂寂寂輒陳往翰以寫欵懷

與姚春木書

秣陵執別妻更京暄數從同人處寓書奉訊動止而瑤華不
嗣疾首滋軫足下削跡家術縱情墳素湘東金管定退千豪
張融玉海行滿一尺聞服之餘委心無量僕劣質等於腐芥
阨境阽於焦原始爲子桑之閉門繼學禦寇之嫁衛奪高於
涂舍乞漿於蟻邱後乃歎祚郡邸移牀使解行慙江革損宣
城之半璫望非王符辱度遼之屣履攬環結佩不乏逢迎此
邦罔筭所駢羅冠蓋之輻湊腥腐所在啄吞隨之而今昔勢
殊羸絀力判向之玳簪珠履金鋪玉碣夏侯四馬之奉河間
廿區之館今且碧鷄息譚阜螽罷躍西園清夜明月澹以收

華東閣凝塵梅花寒而自落加以體性疏放酌酢簡寂餒饑鳳而無賓噪倉雀以有聲雖在戟門無异蓬戶不知者猶謂信陵折節則薛公改其單寒齊嬰下顏則泯午增其寵飾毛卵鈞鬚無足當一笑也惟幸所主志行不後古人文字之間尤極神契鐘金雜奏獨抒夔曠之聰麟磨竝遊弗眩離朱之目音實難知知實難逢東莞所歎身乃獲覩以此自慰差勝羈孤爾近佐輯駢體正宗一書欲以矯俳俗式浮靡中間進退權衡皆係所主裁斷僕雖觀成僅司校勘且鄙文濫廁尤不便置喙其間然意旨所存蓋可畧述大要立準於元嘉永明而極才於咸亨調露文匪一格以遠俗爲工體無定程以法古爲尚其有新聲滌濫煩手滔堙雖在顧門固從芟蕪或乃淺材薄植學乏本原齟齒折腰意圖貌襲珠礫之似亦勿

容清若唐堂集唐一首則變例收之尤陸吳章諸家則別裁
汰之攬翮剔毛具存微旨至於玉堂淵雲之巨製名山崔蔡
之副墨或限於見聞或艱於搜採篇簡遂約著錄無多要以
指拄哇淫植立軌范正無取乎繁富矣脫遇庸目不免詆訶
屬在雅材所宜審聽輒附一分奉塵几席尊選古文他日斷
手所謂異音合奏殊塗同歸者跂予望之已秋風淒厲謹護
眠餐帶水可杭當復相見不宣

小謨鶻館文集卷三

小謨觴館文集卷第四

記碑銘雜文

天池記

鎮海縣志

出寧武城而西四十里古寧化軍所屬地碎石犖確岡巒掩
藪山原之上有池齋濶方廣百頃皎焉冲照旁注汾水下承
桑乾東連元池津脈潛引溹涫之辨見於道元之書祁連之
名傳於佛助之史淳泓激澈微奇効靈歷有年所以逮李唐
資其水草置牧設監車騎所集流杯以嬉蓋亦旋鴻神泉之
亞也閑千餘齡電迅焱逝原隰遼迥素波獨激邊風淒厲起
於厓谷韓文鱗獵淪漪竟川秋花數叢雜無名目傍渚照影
流媚送馨厥性潔蠲不受斥草時有翠鳥銜汚其中激素飛

清尤足異已巖棲谷汲山夫蕡豎習焉相忘過而不睨邑鮮詞人兼乏好事頒賦之樂帶霓之勝槩爾闕如予以嚴辰肅月命疇嘯侶嫋嫋池上天鏡落目心波湛然長空卷雲俯仰一碧大清不滓喜無行舟鳬雁有聲足代漁唱簡文帝云禽獸魚鳥自來親人王司州云人情開滌日月清朗斯池有焉夫影娥太液滉瀔於禁籞高陽昭華淼漫於坰野皆以勝遊鷺人口頗斯池地鄰阨塞人稀獸繁納道武稅駕之所余朱聞樂之年今昔代更喧寂亦異顧不以寥闊改其淵涵陽輝不耗陰霖不溢是非含真蘊素有符潛德者乎瘦日將匿玻瓈漾霞倒載接羅彌望廣豫濡豪記之可俛然感矣

寧武一郡萬山環抱實無名勝足稱惟天池在縣境西林壑森秀最顯於元魏之代北史水經注諸書紀載特詳郡

志有秦雄褒記一通嫌其摹繪未盡因踵成之

自記

泛頽記

乾隆壬子之歲予客汝陰已閱三稔地當頽尾水波激覽上流直清下流曲漪和仲所嘆近在眉睫坐窗不邀悔且次骨乃以伏日傳箋召朋蕉衫葛履出自北郭艤舟五尺隔水招手薩蒲一席當舷展風兩鬢不言背立鳴觴欸搖波開燕尾細翦火雲彤彤覆頭半陰清風習習兩腋徐舉白鷺前起沒於蒼烟紅藕作花近在舵尾岸柳什百或垂或斜時有微颶送之蘸水汀曲叢草香來不名渚間鳴蛙聲出無跡科頭倚窗俯視綠淨照見髮影誤驚游魚半川以上純爲黛色及至前浦乃皆松陰原縈漱廻西湖在目錢唐羅浮名足相埒者葑十頃蒼龍卷空荒祠三間殘廬沒水淪漣半規環若鏡匱

別出一泓又似初月爰止漿牙衡流方羊穿茭拂蘆聽其所泛狂朋圍坐諧笑狎恰酒氣溫靡溢於蘋藻雁鷺唼咤旁窺尊罍伊誰烏烏葦間微吟忽聆悠悠揚帆樓一笛驚雲菑日旣成嘉遊柳癭藤輪或發遐想撫茲古郡壤聯州來翠被出狩楚王侈功白亭拒吳慎人勞役於鑠霸業咸歸劫輪不隨世移祇有烟露豈况名哲晏呂歐蘇星堂柳亭鬱爲蔓草清景一失不如漁夫勝集匪常感我羈士借水洗貌攢文志遊樂而不書抑惑也時同泛者山長華亭進士張君若采郡人明經甯崇禮問禮劉澤青任鯤化秀才亓炌劉倉任之琦郝溶凡十人

題襟館記

淮左腴壤三司嘉除廣麗饒樂汨其外形韶縉均輸役其內

慮至於官商發緒雅歌興賢主宰一心品嚮百氏陶冶所被悉爲祥金弦酌之餘韻此樂石自非灤元瑩素蕩界超神勝情獨標事殊浮慕欲使播扇芳風肇興盛軌難矣今都轉南城曾公峻玉標節星芒授文出承明之廬筭度支之任挈持綱維衆職具舉泊乎其懷冲乎其神惟述作之嗜根於天倪不以埃垢淆不以纓紱易戟寢蕭暇文儒景從公寬以納衆流鑒以區羣族明月入抱唾皆瑤華陽和貯顏物歸藻鏡簪履所盍賓館用開顏曰題襟志雅契也碎石紆徑約纔百弓露檻繚花乃有數折虛白啟牖時來草馨孤青篆爐俄領香氣月話方狎琴歌載賡妍手發藻則思酣茗餘才語隔烟則聲墮竹外橫塵偶落老梅粲容屢心之篇麗鶴亦舞才有宋桷櫓石不遺分無雲泥蘿袞一致此蓋浮世之豔微塵弗攖

振奇之衷千古如在土石侯卿性命文字平津東閣竟陵高
齋以方斯遊亮無忝已夫處紛紜素至道之符也虛衿頤賢
飛走風猷允塞鯁生後來辱廁幸舍命贖申辭用諗來者

寧化定河村臺駘廟碑

伊昔天流洪洞炮媧奏績於蘆灰地判潢洋白阜資功於寄
木疏宣豐物元圭錫石紐之聖隨刊佐治阜旂啟峭函之封
類以神靈力殫奠父是故梅梁敞殿犧尊肅其明禋玉女妻
姚鵠首隆其肸蠁凡以申灌獻迓靈祇崇德報功昭融於赫
也况乎金天衍裔勒勲於庚辰同木之先黑帝分符効績於
元律蒼牙之後者乎惟神業世元冥官承顧頊五行以水爲
本實主其靈長太原於晉爲都肇建其封域粵稽汾水發源

武州山濛流而成巨浸逕狼孟而注大鹵南入河東之界別
有洮水之亭厥惟二川轉汎三晉羊腸石臼之險神奠其奔
湍華谷黍藪之腴神宣其利澤凡武靈之所聞桀賈辛之所
射雉周王流彘之邑襄子拜神之區寶鼎獲而甘泉作宮白
兔饌而竹書紀市綿周歷漢有幹有年咸仰神功俾成樂利
所以重該修熙紹其統位躋乎靈威赤熛之班沈姐羣薦
其馨祀同乎夷鼓青陽之胄國僑榮疾配之以參星酈元注
經系之於涑水唐宋以下享祀勿忒奏橫汾之簫鼓足代神
弦瀉碧玉之清泠堪當明酌叔虞舊壤安侑古矣茲寧化定
河村者左接汾堧右鄰谷口北山經曰管涔之山汾水出焉
此地當山之趾控汾之源舊有叢祠翳神是祀李唐垂令狐
之碑文石晉著昌寧之封號春秋報賽賜雨應時勤事禦災

實符祭法而說者謂神之宣障不在此邦黍稷匪馨義同附
會不知撫冕笏而念禹績不必定至塗山過唐魏而憶堯風
詎在專歸蒲坂此境旣屬上游卽當來格猶之崛峯濫觴之
江式禋奇相析木歸墟之海載祀陽侯豈同夫泗水之祝文
祈巫夔之祠瑞女白龍綰綬李冰惟蜀郡稱神靈鼎分流巨
靈獨華山効異也哉用新瓴甓特薦牲牢盤鵠之雲下垂疑
飄芝蓋旋鴻之池遙注取潔椒漿帝首五官以命正派分形
魚昌僕之儔水利萬物而不爭功超大翳虞余而上銘曰
參星之區有神司寒少昊之裔高陽之官力宣汾洮疏川砥
瀾并州之祠松柏丸丸惟茲僻壤近鄰管州實當汾源萬禪
安流鬪無穀洛產有琳璆於彼於此莫非神庥神之來兮風
馬雲車神之逝兮雅雅魚魚案圖考經豈曰子虛如謂不然

請徵寶書

寧武縣西寧化所定河村舊有臺駘廟及冢墓郡志以爲臺駘宣汾洮初不在此其冢廟應在太原汾州譏里俗附會失實予謂寧化近鄰管涔汾源在焉臺駘汾神立廟固宜特不可言冢耳論者欲并廟而誣之亦拘墟之見矣金太和八年有同知寧化州軍事張守愚碑竟斷爲神墓殊失考據且詞不雅馴先君子官此日命擬此文正舊碑之失廣郡志之拘以備修邑乘者采擇焉自記

明故特進光祿大夫柱國太子太保鎮守山西提督雁門等關總兵官左都督周忠武公夫人劉氏廟碑星環斗極天孫聯上將之垣兵洗蚩尤元女授軒皇之策小戎知義女子嫋軍厥風古矣若乃馮嫽持節於昆彌呂母稱

戈於海曲虞潭之妣撤佩珥以餉師張茂之妻率部曲而討亂荀灌嬰突圍取救潘將軍同幕從戎或先命婦以建旌或合侍姬而教射是皆軍團壯女城號夫人膺崇義之封加貞烈之號鬚眉巾幘前史美焉然未有際海水羣飛之日佐一柱以擎天當敵雲山壞之時蹈六丁而入地家赴紅羊之劫嬪子軍燭力窮蒼兕之呼美人虹起如故明周忠武公夫人劉氏之奇烈者也夫人系分龍叅作配虎臣冰霜瑩其蘭心翟茀莊其稼飾余朱發射盤雕不飛雍容率裙金鞍慣控久已取韜鈐爲膏沐易釵鑷以兜牟矣當忠武公之移鎮三關也地接飛狐峰鄰落雁公以麟振龍驤之國帥屬當烏頭馬角之窮邊朝廷以道濟爲長城羣醜指敕旨爲地虎夫人撤環練士絳甲同仇挑刀走戟都兒亦使受兵窄裹蠻鞬扈養

皆能成隊黨使蒼鶻勿出青犧無驚六纛風閒九邊塵息闌
外則歌騰大角閨中則侯號雌亭房赦和鼙鼓之聲兒女吐
風雲之氣豈非獨張錦繖平分譙國麾幢對樹牙旗復見平
陽幕府者乎無何玉弩芒生金甌國破雁門司馬失律於輿
戶晉陽中丞致身於握節遂乃焦梨噭索黎駒磨牙合黑山
張燕之羣犯白棒王彞之衆蓋李自成旣陷全陝進圍代州
時則懷宗十七年二月也忠武公雪涕登壇投醪誓衆始扼
忻代繼守樓煩發砦磧之礮蟻子頭飛開鞬鞬之丸騎鄰瞻
落九拒九攻六矢不動十盪十決一軍皆驚固將妖走羅平
樓傳焦度而運當元二難揮返日之戈星燦旄頭望斷侁兵
之雨兩甄鼓死百雉城積公猶搏人以投張拳而戰達奚手
皆見骨常山齒欲穿齦萬簇晨飛大星夜落爰以二月辛巳

罵賊而亡事具史成忠傳婦孺固可得而詳焉於時夫人孤不怯兵危不撓勇健兒雖盡尚有蒼頭竈婢知兵非無紅線驅蠶母齋娘以拒敵合奚須臧獲以當關賊燄千屯牙門一角夫人身凭鴟尾手挽烏號戟圍闔而突騎不前星鏑驟而櫈槍四散地鳴鼓角舞樓上之梯衝官似修羅下空中之刀雨殷戰血於鈴閣結蜃氣於虎衙月羽弦開肉飛仙倒蓋其繼公而與賊伉也如長離去而宛虹來耀靈淪而望舒睇一息猶在百戰何辭扞衛侯遮雙烟一氣負哉尚已迨乎董澤之蒲莫繼綠林之刃交攻乃退守危樓積薪自焚關門不辱婢僕偕亡嗚呼痛哉絳雲飛而玉碎赤熛怒而香銷追忠魂於風馬雲車完勁操於炎烟烈電此則魄成精衛將憑朱鳥歌招火及天元足令須彌山動者矣會當改玉未極褒崇雖

臺社之殉其悼乎伯姬而石窮之旌不聞於齊女茲者治隆
粢晏典舉明禋乃修廟食之儀用婉表忠之觀既祔公廟復
設專祠嚴幃闕幄楹聿新桂醑椒漿春秋匪懈某備官斯
土敬仰明威倣度尚之文當巫咸之祝爰鐫文字樹以穹碑
蓋將銘勒金石質之乾坤禮也黃絹有慙丹誠可鑒庶幾叢
鈴碎佩靈風滿聖女之旗萬禩千春石馬壯桃花之色銘曰
時值鴻張運艱龍漢百萬封狼孤軍鷺鶴牙梟不鳴紙鳶信
斷引決全家致身一旦巍巍官廨屹如九關婉婉紅顏嚴於
泰山賊馬縮謂賊曰著瘢力盡一炬隨公九天昔聞睢陽有
陸氏姑又聞梁國江中援桴是皆知兵壯士無殊烈烈霜心
方斯蔑如載展祠宇載薦溪毛女隊次侍綸巾繡袍塞月如
鏡塞草如刀靈兮來歆視此石高

寧武周忠武公廟與夫人合祀碑題歌詠甚夥而夫人貞烈專祠獨闕焉大守盛公屬予爲文以補之據事敷陳其原碑議論所及槩不贅述避複也

自記

安徽廬州府巢縣何烈女碑銘

烈女何氏巢縣人也父業漁城南瀕河結茅撈蝦拘蟻以供資糧女年十歲清英潔白誕含柔範許字同里李氏子承宗特錫雖聘晉酌未薦躬勤滌洗自課牙尺越乾隆五十八年六月二日承宗病歿女時年二十得報慟絕卽撤環瑱欲奔其喪父母阻之女益悲號勺漿溢米不入於口姑姊妹娣姪媯東廂輕塵弱草綢繆慰喻女終不怡乘夜自絞家人覺救而甦十一日父母他出勑衛稍懈女乃伺隙沈身於河濤渺渺淵網撈不獲方愍逝魄永淪重淵乃以十三日夜二更尸

忽浮出水面適當壻門壻家亦瀕河遠距半里逆流而至止泊不去風波動盪若牢繫然引而出之髻鬟整妍膚理玉色不殊生存紩帶裳而周身爲窮綺以自潔矢心堅定之域抗軀頽瀾之中吁卓赫哉昔之刑耳勞而毀髮截鼻縷纏巢燕之脚粉書陰字於扉勵節明白聿爲禮宗皆以諧偶感激恩義若乃守報板悼髡髦女而不婦義以勝情秉瓊懷以自持捐瑤質而相赴於禮爲過在人斯難宜乎精誠所感河伯爲之効靈英爽攸寄逝湍不能蕩幹矣浦江霜酣巢渚月苦想像貞魄明明千秋大府旣以事上荷 綸綺之錫苟無元石曷以昭示跂瞻聳慕襲成此文銘曰

貞木之性不以禪移女子有懷不待結縗伊彼英淑安矜其姿二十春風心存我儀忽彈黃鵠涕下如縻繫纓有屬誓心

相隨百折靡慝沒身清池嬾婿玉雪潺湲素流飛精入淵逆
波而浮左相馮夷右扶陽侯乘風彌雲依魂九幽末俗靡靡
如川之瀉女以身砥障其東下兢兢禮防高門或然豈况庶
賤植節無愆白水秋月空山猗蘭陵谷或積貞珉不刊

陳采谷墓碣

采谷諱若芝姓陳氏元和人采谷其字也祖初哲以乾隆己
丑進士第一人由翰林院修撰官至湖北荊宜施道父兆雄
候補鹽課司大使采谷生五月而孤七歲復遭母衛氏憂邊
讓乾蔭早傾翦髮之年韓康複襦不暖琢釘之日其從祖某
與其再從叔某共鞠之分毓飯於鄒公假生衣於汜毓桑附
枝而漸沃草寄生以昭蘇迨十一歲復歸其室與叔兆賢同
就外傅慧心朗解踔絕常兒揚烏詮易通義於藩羝裴駿誦

詩悟旨於鳴鹿以方幼智諒無惡焉編削摩研稍長益勵千
五百穎筆秃於條鈔八十一家心識其流別猥以清羸恒患
劄屢學勤猝掌體苦列賓年十九疽發於尻濫焉遽逝嗚呼
猶窮剗殺空讀姬聖之書集號童蒙未竟德輿之業天闕之
痛昔賢所同兆蓀竊啟寡聞謬忝師授抽衣解誓多負於蒙
心紓軫摧弦永絕夫元賞茲嘉慶八年某月日將葬於某山
某原遺車速駕叔兆賢屬爲銘辭爰述厓略碣諸墓左志長
殤之石例倣渾滂慟不秀之苗感深蘭玉已君生於乾隆某
年月日卒於嘉慶某年月日以未婚不得嗣嗣從祖之孫某
爲父兆雄後云

檄城隍神驅貓鬼文

年月日具官某謹以清酌庶羞昭告於城隍之神曰昔者魚

脯鯢殼齊君立五更之祭樂車寓馬漢后啟三垓之壇長陵
宛若亦奉神君雲陽帖鄭尤崇巫祝迎年畫法前典攸存逮
觀右賢左戚之朝虎武龍文之治天鏡照而黎邱滅跡乾暉
煜而靈場失威六席六綵郊社無愆諸逐諸嚴牲牢悉罷苟
有慶忌於蠻之蠻倍阿鮚薦之燒嚇覩嗾巫營董爚餅必將
驅甲作命臘振棒用捨植物窮五西行鑿齒疇華之殛落白
蜋嬰茀之仙未有喚陽罔象添竊瓊茅澤豕山魚貢儀金累
者也茲邦地匝岑嵒風成蘋果桓葱莊劄頗擅五兵楚鬼越
禨無聞比屋惟有貓鬼之祀實類猶都之妖獨孤陀奉而稱
神徐阿尼憑而爲厲流傳弊俗漸染巫風像倣煙蘿沈水薰
而鱗似飾叨芝蓋羽葆合而華敷敦腴血拇豐脣蒙供之面
女丁婦壬眇矯冶夷之容子夜寂而蘭膏明丙符然而荆幡

動遂乃挾邪作蠱鬼笑靈譚不枕戶櫛遽遭蹠首直排櫺闈
有類儀身羅帷卷舒人醉摩那陀果楚雲誕幻春酣毗瑟皴
天浹席坐生流庭輶走似丹朱之憑房后甚公嫗之娶唐山
幾使戶飲淫泉家芟貞樹女媧七十二化有此閃屍洛陽千
五百神無其妖露際此金科照律玉燭含光凡夫東陵聖母
石印郎君駱曜納匿之法黃公粵祝之儔罔不匝宇潛蹤綿
區戢影由庚載作左道咸誅豈茲小鬼之神乃假巨人之跡
某職當守土氣涌如山感悅驚龍久清陰訟妖雲悖雨詎追
王章業已盡械婆羅窮搜鼙鐸率弩父亭公之衆奮桃更焚
索之威祝融一怒繪畫飛烟金布三申米師貌魄猶恐沈履
寵譽陽律難施騰簡強梁冥誅攸賴用修蘋藻冀降明靈伏
望彈壓氛祲劃開聲勢爲忖留惡覩爲長房厲詞淬刃於度

朔之山傳札於葛陂之老務俾鄭驢山鼠悉就殲夷天狗讚羊同歸柳繼庶幾眷言婉變救月弓彎齦其姦猖獲雄兆協鄉社絕八通之道閭閻開六慎之門畏子不奔分奠下民之疵癘助我張目不求神聽之和平

寧武俗祟於貓鬼巫者緣以爲利先君子宰是邑械衆巫至揆畫像盡焚之出示嚴禁風遂絕此告神文蓋命兆蓀擬作初藁也久佚不復省記嘉慶丙寅春日偶於大牛篋中檢得之因稍刪潤繕錄如右自記

祭風伯文

年月日某謹以庶羞之奠致祭於風伯之神竊以桐生茂豫必噓以活其枯異葵蘆蕭貴撓以宣其氣其有翹莖漢德含萌抽芽滋液滲漉旣邀屏翳之恩被麗披離尚仰蜚廉之力

所慮鼓竅怒號焚輪起勢吹山作地回海生瀾異唯水之圍
沙石羣走非昆陽之戰屋瓦皆飛以致角澤彫柴辰畦失秀
懸黃一敗抄白無期今者膜稷告登縵田書有惟神佐流天
澤俯祐歲功五日無眚八節咸應經堂汎瑟宮商和而鏘金
吹花送香罷亞翻而蹴浪不徐不疾中精涵夫大元唱于唱
喟羣方悅其吹萬歡康見助昭賽宜酌敢偕戊巳之尉祭倣
蘭麻虔告丙戌之神儀修柳燎聖曰時若永清礪車之雲靈
來肅然請卷歸旗之雨

告楚元王廟文

彭子兆蓀以嘉慶丙辰之元客於淮陰府舍寥閬羈緒不怡
閒游市廛有漢楚元王廟焉緬懷緇衣好賢之誠遠追甘棠
思德之義瑣旅下士伏增悽戀乃以香楮敬謁祠宇而俾祝

讀文曰側聞魏文既逝游西河者愴懷信陵云亡過夷門者出涕豈非吐捉所被白屋感其揚仁盼接之殷素士因而慕義者乎惟王連枝隆準作輔姿精受浮邱之經淵源乎苟况從藍田之戰發跡乎景駒始膺文信之封繼受彭城之縣赴善若渴說士尤甘性好讀書手爲次傳亨萇嬰固遜此專家賈鄭匡劉紹其絕學呂穆生申公白公有同學之誼授中大夫之官歌白駒而逍遙賦呦鹿以式燕降宗英之重執贊而親布衣忘穆屬之尊禮顏而登俊士乾餗不失醴酒常清當時若園綺之於漢惠鄒枚之於梁孝淮南之招致賓客河間之篤嗜藝文類皆承稟王風以爲則倣厥後異代世有令藩南皮飛蓋之游東閣翹材之館籠爐飲扇供具盛乎芳林刻燭弦詩優禮加乎西邸凡所以敞虛襟延韋素勢等於浮雲

士歸如流水何莫非王之哲範啟之於先哉夷王郢客嗣爵
靡怨亡何驕裔承祧作奸忘道遂致胥靡刑傅賢辱赭衣冒
邑衄師身膏白刃凶終隙末論者惜焉豈知歎夏屋者秦士
乃康公之不承疑昌國者惠王非燕昭之失德古今賓館禮
衰權輿興慨大都釁成於怙侈識昧於頤賢未可以朱均之
朋淫議勲華之棄士也世越干禪廟寄一廛屬有鯀生來棲
鳥幕弔古韓侯之里傷心漂母之祠國士伊誰王孫孰飯桃
人土梗竊感愚衷玉几金牀恭聞故實爰倣初明天臺之表
載繹孟堅瓠史之文作歌有等於告哀薦楮敢希於邀福嗚
呼王如來格鑒九原尚友之心我恨生遲灑千古依人之淚

按漢分楚地爲二以在淮北者封元王交以在淮南者封
荆王賈後轉封吳王濞楚封東海彭城薛郡三郡三十六

縣是時淮陰射陽先屬荆後屬吳絕不在楚封境內其祠
一墓流傳蓋皆附會不足深信也

自記

甯徵君誄

維嘉慶五年月旦故徵君吾友甯君止齋以疾終於汝陰里舍君居江北我居江南聞信駁悼爲位而哭嗚呼痛哉君諱問禮字景陽一字止齋潁州阜陽人也陶正之系蟬嫣乎有熊溥闊之華冠冕乎頽尾貧也非病家有賜書正而不它代傳長德君生卽愴定幼稱茂良人貌而天役德勵冠雲之操視歲若月修業無息版之時少失乾蔭奉母而居與兄崇禮明禮皆以郡明經爲時模楷何家三隱尤數小山賈氏一門首推偉節有讓瘦推肥之誼無緩儒弟墨之嫌煦煦乎莊莊乎出爲人師入奉子舍酌生徒間奇之酒以壽眉黎分博士

賜餐之錢以辦甘滑太夫人顧而樂之雖三釜之悅口六珈
之彰身無以過也性鄙浮薄不濫約歡苟有投分必罄衿抱
得何遠妄語足賭一練爲元伯結言不遠千里測交敦行義
盡此矣生平研閱所及約下萬籤咫聞弗尚必稽仲尼之心
蹏涔可羞博窺容氏之掌發爲翰藻動符經術削柿以寫闋
意入於大爐據梧而吟精思應於鳴鑄雖復中年考校逐隊
充賦所性不存守學彌篤會詔徵孝廉方正之士今河督
王公時爲郡將熟聞義聲獨以君名上於大府桓範下士驅
傳而舉幼安郭祚進賢列表而推高綽人謂披泥抽玉沈川
掇珠將命封軺之駕入承明之廬矣君乃晦不圖榮道不偶
物遠慕漆雕未信之語并無田生致親之懷公府三辭弓旌
虛責幾將如劉訏挂檄而逃學夏統拘謙以養豈非赤石不

尊節士之必國爵屏貴家人忘貧者歟彼懷軸覓舉掃門求
知買聲濶扁之書希榮黃素之冊者伊何人哉伊何人哉予
以弱冠客游茲邦獲奉茵憑遂聯僑札焦陂雨霧西湖水澄
雪旦風朝暄辰肅月步屢相逐乘酒互賡賞一卉之豔則聯
情發藻晰半簡之義則騁詞飛辨執古之醇聽勗我以葆真
離世之垢濁引我以元曠古之人所謂組織仁義琢磨道德
形應影隨如蘭如芷者斯之謂已飄蓬轉風遂成離索書牘
問訊七稔無間不謂一旦寘焉長逝嗚呼痛哉後事之託有
愧於鍾君潁川之碑何裨於陳寔要惟哀情不能已已乃作
誄曰

四海朋友誰心誰面充路儒冠誰真誰贗矜靡波流經離道
畔障瀾而東以一砥萬惟君貞德不然清皓素帷不開黃經

自抱伯墳仲篋。蜚聲掞藻有母聖善怡顏忘老。愉愉內行肅
肅文林其風肆好。明月在襟壓架萬帙挂壁一槧。操翰落紙
鏘然古音潛德。自曜幽光不蘊召南行義。聞於淝淮鶴書下
蒞元纏載來聿爲辟首。登諸蘭臺君曰否否是豈余慕遺榮
盡倫安我繙素赤緊難爲。蒼生恐悞非敢鳴高煙霞疾痼惟
君之志介石比堅知白守黑披莊草元憶予交君庚戌之年
迄於甲寅月六十圓。仲宣作客書劖三秋。士衡老屋東西兩
頭汗簡同炎紅螺對浮分花鬪句隔燭燒愁及爾如貫單情
得雙牙弦迭和洪鐘屢撞自予南歸楚水吳艘。缺判璋分盈
盈一江予作勞薪君高衡草少微煌煌寥天之一何圖崇朝
鵬鳥鳴室報書遠來驚聞輟瑟嗚呼痛哉君質如水進德如
火以火鑠水知其不可嬰疴幾時服藥幾累津堠遙遙憮然

雲墮嗚呼痛哉憶予喪親時客君土君爲經紀立我於戶憫
予孤露謂予母苦宜紹清芬勉旃力努及平分張函問綿絡
勸加餐飯飭止格酌刺刺千言憂予體弱豈意長星先壓君
腳嗚呼痛哉君有母在白髮垂垂下無遺孤寥寥總帷孰爲
君嗣孰贍君嫠予涕不止阿兄可知君之遺文予有半箱舟
車出入或存或亡誰爲哀集闌其幽芳如椒斯馨從風以揚
言笑在耳酒痕在衣淮雲潁波仙耶是非實以誄華表之素
旅用激頑懦清規世稀嗚呼痛哉

翰林院待詔徐君妻吳安人誄

歲在昭陽斗維建己吳江徐待詔達源執訊寓書以其內子
吳安人之喪來赴於予瓊範收華瑤光掩彩櫻梓之慕感均
古今豈況同心駢穗失蘭臭於房敷緝雅剏風斷棄絲於炕

儻此尤黃門永逝之淚雷滴晨檐希逸哀誄之辭風鏘楚挽者矣安人諱瓊仙字子佩一字珊瑚前身娥月生具圓姿夙世璇星長工織句九梁郤飾惟裝玳瑁之書四葉開屏只綴珍珠之字迨乎笄總歸於吾友徐君鵝翼齊心蛩壇儻影剔金釭而喝韻排鴻朗以分茶賭側體於雲藍曉黛顰展聯秋吟於霧幌夕蟾娟來四壁花深一樓香重勝趣旣協間作雅遊當夫蘭芳逼人嵐氣入野輒復携鏡具命煙舠磨蘚石而畫釵痕刻槐眉以銘元跡草木掩藹如帶香煙衣裳飄搖若負星月是雖玉簫吹鳳瑤裝駐鶴不是過也徐君嘗宦京師半載而返王寬夢想之勞高柔愛玩之志雖有華袞不以易蘿薜已維時惠問川流勝儕膺集成陰接軫靡間弦晦安人魚藻以召之雜佩以贈之一枝松塵蔽障談元十樣蠻牋隔

屏授簡陳局星晚奠爵露初墮異連波恒隨綦跡人如劉柳
服到心形蓋青鳥翡翠無以喻其婉變矣無何恒幹不居舜
華忽謝彩鸞委世遙天之笙鶴如聞紫玉成煙樂府之妃豨
孰和嗚呼哀哉徐君煩冤紓鬱涕下如糜檢故物於凋奮搜
殘箋於蠹篋乃得已未歲手書題拙集詩二首絹素欲裂煙
墨猶新曲飾蘭言兼憐桃泛琅璈戛罷偏留賞於孤桐瓊簡
繙餘訝垂光於塵札半格獨詠一燈自怡徐君蓋未之知也
逮及今茲方始緘寄嗚呼哀哉倘使綠字不傳縹囊終闕尺
波電謝清都路遙則豈知華鬢天上尚餘不櫛之鍾期朱鳥
焚乎芝蕙風傳玉度敬換德於旒旗其辭曰

結璘誕秀琯朗降芬珠戴明月髻梳瓊雲宛宛麗質託緒讓

君光啟幼德如蘭斯薰裁衣織素弄鸞爭花修詩貴道其儀
孔嘉白家金鑾宋氏若華咳唾珠玉卷舒雲霞施襟東海侍
姆北堂威姑怡顏元胤承筐妾發高詠郎裁報章三春花柳
一門官商寫韻樓高行窩日麗葛歌分箋栗典閒隸鶴蓋團
賓籥漿汎齊脫環佐餐刻燭呈藝雕陵凡質折楊孤唱久拚
補袍或用覆醬何圖中閨乃覩牙曠百番赫蹠十讀招悵銀
管妍製烏闌細書閒評香南自賞花餘惜惜琴德沈沈綺疏
緘縢三年玉佩瓊琚柘館春歸瑤田路絕返真絳河昇靈霓
節瑣琯殘言發諸局鏘尺幅函馳千行淚掣嗚呼哀哉組帳
空兮簫局寒落花寂兮青苔斑掩珠櫳兮罷吟雨汎天潯兮
睇乘鸞何慧業之邁等嗟長年之獨難要塵網之津濶非神
躬之所安匪留遺馨巾見餘軸粉痕簡青字跡繡緣明明琅

書眇眇法曲盍麗金繩裝之寶錄嗚呼哀哉彼妙境之彩伴
兮猶痛乎珩佩之徂音况文簫之珍偶兮兼文字之緣深松
局閉兮白日遁蟲絡絲兮長簾愁飈車逝兮太霄路簾影黑
兮珊瑚鈞蘭馭風兮芬遠悵瑤情兮千秋嗚呼哀哉

祭陳生采谷文

維嘉慶七年十二月十四日鎮洋友生彭兆蓀敬以冥楮清
酌致祭於陳生采谷之靈曰嗚呼桂以芬蠹膏用明煎之子
察惠竟天天年撫今怛化感昔周旋反袂拭面能無泣然子
之地望華儕右宗大父甲第影纓宣風王氏鎮惡鄭家小同
繁子是賴清芬後隆子之秉質慧發髫辯萬鍼鱗排雙瞳水
翦如瀾之翻如瓶之瀉誦聲琅琅輒數行下子失怙恃聿自
弱齡赤子扶扶孤露伶仃脆弱其幹清羸爾形送暖嘘寒誰

哀寧馨歲在屠維子年三五我來授經繫辟相語葉公子高
行不勝衣若周閔天面無見肌諗子銷鑠程課輒懈天性所
存學忘其憊春簾雨餘秋堂燈背網羅羣言囊括細碎三史
涉藩六經上口旁窺莊騷下泉韓柳間出臆論進退可否呢
訾小儒或駁而走張純授簡雖妙詞華應奉談典多聞早誇
數奮桓穆辯析瑤琊鍥而不舍將希作家自我別子歲陽載
更今秋相見揖我東榮麾廢柴瘠我心私驚勉爲迂言勸以
令名子緣沈疴早謝奔競捐棄俗學爰清爰淨卽難梯榮簪
笏餘慶或能著書禮堂寫定豈非盛事轉敗爲勝子顧而唉
怛焉神傷多負明指精亡學荒一把孱骨三竿夕陽苦語依
依心知不祥霜嚴野枯天寒晷促顧隱支離柳生介叔上藥
力窮中醫手縮奄然千春歟爾一哭荆玉將剖碎其瑩姿芳

華欲茂蕪飈率之亦知悴質難嘶髮皤弱弄而殞傷如之何
惟子篤嗜曰詩古文鈔撮劙緝羅絡放紛叢殘遺餕有草有
真子未成室發楹無人零札誰護碎金孰珍繁我區督銷聲
隱曜繆爲子師三稔言笑我非揚雲子其侯芭身後之託舍
子誰耶詎謂之子乃先我往浪浪清淚悽悽冥想聞子彌留
神觀澂澈或隨修文海山兜率又聞地下多古賢蒙子儻見
之應無鬱陶絳帷寂颶翔吹將作金鹿才難元龍祚薄姑酸
寫哀拉雜參錯子其鑒歆用脩明酌哀哉尙饗

祭裴母查太宜人文

代

嗚呼玉縞則摧芟枯斯拆湘竹凋霜華蓮殞雪揚徽有形弭
蓄無期纏帳哀銳松門涕層猗歟令公母教弗怠鄭實經神
何惟學海孟草心傷萊斑罷彩春暉旣傾芳猷宛在猶惟宜

人門華闕清燕雲鍾淑謝雪蜚英四德允宜三星爰卜服縞
籌鑑屏珠郤玉祁祁令媛巖巖贈公一行作吏八口乘風輶
水如煙廬山似黛桂楫將雛桃花詠讚鳴堂斯蒞魚軒載歡
佐陶需翟訓柳惟韓仙吏頻移慈雲屢展合鏡燭奸分棠蔭
善鴻案方對鯨波忽奔攀菱擬漢沈玉勞尊救惟民先避惟
身後雪浪環飛危樓獨守民歌元亮士感班姬十年梅尉千
載蘭儀直杖催歸芝輶途啟風送滕王波翻彭蠡元雲下
驚飈蔽霾天低水白月黑舟推危地能生呼天是禱作善降
祥終邀神保宣人燕詒我公鵲起千佛登名芻尼送喜蠟蠟
塞紫鷄鹿山青經傳紗幔禮秉萱庭寫化鳬飛鳳將子往百
里饑鴻三秋魑魅典環餉士脫珥賙氓斥堠無燧夫人有城
爰自山桑量移淝郡陶鮚封書鍾儀誌訓潘輿正暇驛馬驚

來龍門脫筭瓠子隄開會驍陽侯頻憂河伯月府飛精星娥
返魄嗚呼宣人卓爾女宗薦蘩職理賦若才工今茲畫知昔娥
日丸熊嗣祿則孝佐治惟忠惠問川流榔鼙音寂侃卜眠牛
歐悲畫荻絳帳鯁生椒漿敬灑靈兮來歆降茲渝翟尚饗

葉竹孫印譜題詞

芝英白素百封之斗檢齊開麝酒朱轡十里之雲香不斷擷
元山犀匣羅蒼史螭文波欲廻鸞籀真顧鵠可謂敏藏胥臚
巧發豪銛者矣夫自變撥蠻爲車渠易範銅而花乳人搜青
田之寶家貯蘭金之泥碩乃手劣體三心盲書六尾缺五而
非馬丞下四而爲羊得無齒冷姜王見揮吾趙乎葉君竹孫
珠吐霞含書神畫聖十人才藝萬里萍蓬旁及蟲雕尤工鵠
刻琢演黔之石髓玉色脂凝鐫衛霍之金章銀黃斗大霜波

淬刃剗雲則薤葉紛披勾漏移砂印紙則桃花欲笑莫不瑕
鏤山骨剜剔雲根手彙一編藝超百代如得王休之璽靈光
燭天渾開張顥之椎金精溢地是蓋棲神冲穆刻意凡將遂
乃兩史皇而闡能四鄭虔而稱絕得言忘象精蜚郢石之斤
泥迹求神想見工倕之指僕一丁未識二酉思探琢玉鎔金
夙昧心於妙技秦碑漢碣頗馳思於名山君於鑑古之餘兼
述援蘿之樂點蒼石潤岣嶁文奇視此纍纍予懷渺渺誠恐
六丁下取盍藏諸玉檢之封苟其五嶽能從請佩我黃神之
印

飲和軒讀畫詩跋

右古今體詩三十四首合續題詩共六十八首蓋華亭張君
若采以乾隆乙卯薄游淮上與兆蓀郡齋讀畫兩人倡和作

也維時九旻暮月庚辛處驪山鄰桂樹訟閣秋清塵捉松枝
雲亭彥集學山之情旣洽德海之波載遊觀察王含谿先生
履德養空激懷味象退食之所顏曰飲和畫戟撤衛燕寢凝
香椽盍六曹花催十酒乃開米舫下陳榻坐清獻之堂出鄭
嬪之祕排比顧陸左右荆關披圖授牌効異山海萬筆秀而
元牝靈真宰訴而上帝泣莫不應會感神怡身蕩累於是退
居理氣止觴臥遊煙霞渝於豪素岳瀆引其曠思繩窮匪開
信紙和墨八荒坐究四聲間作釭花燼夜而筆陣方闡鷄聲
唱窗而心兵互鬪張彥遠評泊所已及趙明誠金石所未收
皆將銜其山川託之藻詠手無寒具詩有秋心可謂吟披嘯
卷同幽共深歌薦于而聯袂讀法言而并帙者矣惜也張君
以事旋歸予亦獨唱寡和桓元一厨目不及半少文四壁詠

未獲周流連抉判之辰惆悵卷還之際遂卽日來所作合寫
付裝評書之什亦間附焉夫妙於神者匪言象所滯過於眼
者惟煙雲可懷道由境深故楮皆融趣之物心入水淨塵札
亦棲貞之資可以安百骸可以遺萬慮可以悟衷散賞可以
應目暢神何必逍遙蘭山游盼春圃然後爲遐標特立哉發
清識於煩城邁仙骨於俗境他日訪道具焚睨目羽人氣上
乎白雲形超乎朱紱指圖爲盟息壤在彼矣

潘榕臯虞山秋眺詩卷跋

夫調暢襟靈非蔽蒸所可囿藻鏡林漱惟鎔豪爲有神古有
抱浴元素土石侯卿釋袞而襲蘿衣策梧而窮巖趣謝客斤
竹孝威新林屐齒所臨符采溢發豈直志一日之澤索風前
柯實亦發五蓋之蒙廓情外域也榕臯農部含元精之和氣

秉陵飈之雅姿儒林丈人振跡乎綺歲會嵇內史味道於耆
華雖復朱輪一門金花四壁獨謝銀艾殫心寶書偶以家衡
之閒肆探山水之窟虞山北比瀛甸俯臨尚湖獨峰採雲衆
壑送籟疏篁奏而水綠錦樹烘而谷頽聿惟九旻蕭辰平原
彩色紅縛雙鳥健支一筇披蘿徑仄睂間翠生馱槩人來煙
中語響秋色寸寸貯之虛襟山情陶陶橐於肅月迫乎煙駕
意勑高春景斜爰命雲藍疊成星句榛煙出谷旣極范模蒿
筆秀靈加之圖繪眇眇焉逸逸焉可謂邛壑夔龍衣冠巢許
矣兆蓀采藥有志梯霞無期十讀循環三百起躍過此以往
或得丹泉之術終慰紫芳之心山圖赤斧引與爲曹若邪雲
門將從此始富探十祕賦裁九能裏糧請隨斯卷其約劑也

花兜紀遇詞跋

白堤蓮花兜者要紹所駢羅宴娛之結輶人皎若月水行皆
仙紅么和偏郎之歌青荷文中婦之鏡靡曼柔些頌斌咸戾
武林何子夢華高子爽泉以雪鴻團爪聊浪前川一日過予
槃談_豔稱所遇則有昭惠妙裔絡秀綺齡函菱疾以唉風嬉
旌旗而耀質質雲垂領尺腰飄煙曼睞翦秋南浦凝碧清靜
愔嫕堪可薄妝銖衣當風桃李皆俗於是抽觴泛釀廻潮命
笛手玉混塵眉煙繚花歌緩橈輕鐙涼話暖不自知其宕往
也酒闌分張惆若有失勺藻之懷均不自己互灑蘭藻抒其
綿攀恤恤乎思深哉夫蟬娟此身波蕩芳華浪人之遊雅士
弗尚要以情塵不祛綺障攸託鏤刻空花張挽羈緒張愛網
於柔翰寄瓊思於輕苔原其指歸迄於麗則陰淫案衍之譏
非所語於此段矣曳夢牽雲闌風擡絮資其疊拍鬪此雙情

異時拾春餘之墜歎溯紅情於未簡二詞蓋左券云

陶鳧鄉四影詞跋

贈影始於泉明賦影聞於謝偃鏤鹿畫冰工矣未也吹葉嚼
蕊通幽入元自非妍心渺克斷手陶子鳧鄉麟鳳其采雲霞
爲胸詩歌之餘旁及乘趣固已祖鄱陽而禰玉田矣間以繪
聲之才奏刻玉之巧四影詞出五光爛如躡靈胎於香國追
魄奴於衆芳纖絳去塵課虛叩寂遐哉技至此乎采真九神
誕而不實子野三語約而未詳以息相吹映月而弄儼之繪
事蓋東坡畫頰也懵者或虛幻求之爲罔兩之間夸父之逐
儻夫

黃孝子贊并序

夫勉心景跡夏侯流詠於子騫聞風永懷遐叔旌善於知道

皆以篤行淳備克守天經播之雅歌用附惇史淑靈所稟載籍具昭顯顯江夏實超古烈沿及苗裔至性益敦以彼生業未耜遵乏典墳而代閭左之役旄期獲安反輒前之風鬱攸退舍剗臂以箋岳籙沈痼爲蘇椎心而守聖虛辟踊無數道首百行誠感三靈宜乎獨楓改里入袁榆之表章六闕樹門榜楊爻之世德矣孝子黃氏名機字聖猷吾邑人事詐州乘時越百年屬有孫枝子忝戚末以前邑侯長沙劉君暉澤所爲家傳演治傳跡用揚前休誦循陔之什雅慕采蘭繹式間之文尤敦敬梓爰作贊曰

二儀肇建人紀聿興粲粲門子景儀閔曾粹和鍾毓匹庶烝烝外繇顧山躬當踐更滌灑柔滑必絜必誠侍疾謁醫爾足數程引刃默禱殮骸委形九地哀動三年算增輶車在室祝

融猝嬰大呼帷堂精激隱冥廻燄熄百神効靈州里欽式
冠裳敬生日月雖邁誦說猶馨中壘宏製樹之風聲譽賢
裔永葆先型匹休文彊垂芬億齡

曾母羅太淑人七十壽辭并序

粵惟旃蒙赤奮若之歲月在孟冬辰在析木曾太母羅太夫
人七袞壽辰時次公轉運公以稟料之頒繫齊其膳牙繡之
服嬖婉其容羣僚從官罔不龢會韜沂填門瓠爵爭介率將
斟酈泉之水爲聖善綿齡進華岡之枝爲眉梨篤祐於是代
舍賓從絳帷生徒咸鞠贍再拜奉觴而言曰夫松茂柏悅安
貞本於地符震出坎勞成功資乎坤德是以金陵毓彥貽謀
推鍾媛之仁母儀流徽書法首都水之傳世之膺揄狄御安
興延鄉石窮之封朱鳥班麟之祝此浮俗之所尚非令儀之

所存蓋福堂壽車致之具其本褪流慶衍持之厚其基旗賀之算匪假乎頤眞駢蕃之麻必源於行義今於太夫人可得詳徵焉方其鍾慧綺齡宅衷彤史紜紓獻功之訓日熟於縉繩鉉鎰辱金之倫不留於盼睐美藥爭花之侶獨以讓果稱廉銘椒賦茗之餘要以研經畜德逮歸於贈公文木公也羣酒承顏鳴瓊佐理輶土擊車之會畫雉韜衣木天視草之辰聆雞警旦及乎虎符出守魚軒蒞治太夫人問俗齊風觀政曾甸沈香弗御成吳隱之清操丹書對披識崇公之苦志姑臧孔奮茹菜而同恬丹陽李衡得柑而不植神君之望壺助爲多爰以鍾祥大啟宗慶今轉運公緯曠協度銑社抽英慈訓夙湔胎養多豫讀范滂之傳卽勵風裁授韋逞之書早儲典誥繼乃東堂射策西垣掌綸復以詞臣遷領版使維時東

南均幹之地江淮禹筭之邦

高宗純皇帝以經妙者國之紀租庸者民之天非得駿雄弗能効職爰自禁掖出典度支迨今

天子嗣統紹衣倚畀屏藩十逾歲律公峻節壁立惠風春揚青冥聳幹梯接胥窮白水盟心脂膏不潤屬當調遣絡繹饋饋頻繁而鉢趾無寃齶手如斷偉績屢奏吏民大和此固公之經國謨猷蓋亦庭誥有素焉時則太夫人含飴就養作賦之官崔五原臨政秉母教而始行雋不疑行部問活人而乃樂袞無子發之饗庭絕田稷之金芬馥之譽仰夏侯者溯羊姬塞淵之休頌魯公者稱壽母赫來焯往美矣備矣然且貴能遺榮儉以葆泰處靡麗之會悉屏妍華被翟茀之飾弗忘儒素慈渥之溥旁逮於賓僚苛燒之微不施於臧獲此則龐

洪介祉肇啟固有端烏奕降祥純常寧有艾乎屬當設帨之
旦羣修奉籩之儀三山傳婉姈之書九重問齊賢之母花
名晚節山曰後隆凡申錫曼義之方來屬榮曜徽華之必得
而兆蓀等獨有進焉者則以聆輿人之臚祝卽是琅璈傾衆
士之心波足斟雉鼎何待雲屏綺嶂繡盤帨之華言婺彩星
芒卜春暉之常湛也哉時俗諛禱不足以恩賢明按古者嘉
禮必有祝辭秦漢以來類以歌辭爲壽揚舉令言稱道洪熾
甚盛事也不揣拙僕敬獻頌言爲太夫人侑爵其辭曰

熙陽穀旦壽觴跽陳四德含章是法是遵惟德之尊惟福之
存黃髮有慶成此禮門穀旦陽春壽觴再侑常珍鍾金前席
加豆中楣嘉樂自天祐之羣流感仁自心壽之三爵旣具穀
旦熙陽令儀烝烝保艾北堂永錫難老純嘏爾常戢穀馨宜

以蘄於世昌

吳中畫舫錄小引

藻野縛川之俗單舟疊舸之鄉扇薄衫長珠搖釧動水明樓直照影皆雙日裏風中吹香盈路俠嘉夜含霞扶迥羞而送態蕩魄而悅魂蓋廣微吳地之記士衡昌門之謳芳澤弗陳觀縷未及矣於是西溪山人選練妍華甄綜衆嫭北里之志妝樓之記孫棨張泌撰述重新莊士非之達者達焉夫采唐秉簡並錄輶軒鳴瑟跕屣亦登地志觀政者於以別貞淫采風者於焉寄懲勸况乎感薌英之易謝道人因而悟禪軫風槩之漂流僑士緣茲慨遇或指爲導欲訶以蕩情過矣僕王琨避罔略异拘方散愁入室頗能繕性茲不辭而爲之引者亦以君非女閨之曹邱蒙何妨爲麗情之元晏乎

臥看滄江亭記

丹徒五州山者江介之嶽靈郊垌之奧府左瞰浮玉右挹鍾阜丹霄仰熙則呼吸辰漢漾水俯藻則飲吞荆揚襟衛吳甸抗衡日觀昔在蕭梁顏監崎路獻其謳亦越趙宋蘇公滄江銘其字歲序礪截貞珉電掃精藍旣移翠墨旋剝今都轉運使曾賓谷先生允能蘊才千仞立槩偶以政隙命儔昇眺天風浩浩振蕩乎珮裾地靈羅羅涌現乎眉睫排煙罩霧擴宏襟於岑巒盤渦峻湍契淵衷於潢漾感此名蹟沈蘋榛蕪爰諭郡人搆樹亭榭卽用文忠題語揭諸楣端蓋以標舉襄軌昭式來旌甚盛事也繫昔子淵陟岳凝神於繫練定公臨河致歎於端委自非具秉仁智孕抱璞奇渟峙之間鮮克協趣先生以涵負之胸會吐納之境觸岫延賞耳虛目開宜乎素

翫遐矚神心妙達者矣矧夫聘神皋睇康阜邑社之駢坐淵
邱之粲晏山祇奠安水若息警必將敬念 魏闕肅仰懷
柔於以壇撫川塗宣布 德意所謂江壯野茂非徒如延年
所稱者彼襄陽倒載之歌僅翫風物峴首嘵息之語祇戀聲
名以昔衡今未可齊珉碧石介璧於是乎書

文學金君誄

金君諱鳳翔字虛谷蘇州長洲縣人徽哲之姿發於髫齡敦
性之性孚于州閭掌錄舌學以墳典爲笙簧鏤心織詞以理
致爲心腎年十七補博士弟子員博咸少長學門管輅早稱
譽偶作六儒之論藻搜璧流摹三體之經手鍛橫卷爲諸生
祭酒署儒林參軍固將公事發策寵趙興以徵書器服充庭
酬桓榮之稽古矣而乃禿落英曜摧殘羽儀元和墨義大經

雖通程子中謨屈聲屢振蓋應鄉舉者凡十有七次奇隻不
耦坎壈孤飄成夏侯之抵疑著子羽之頭責無怪乎荆璆獨
抱泣刖足于卞和瓊瑰盈懷類涉洹之聲伯已生平篤嗜宋
學希風洛闡鄙王夷甫之談元慕崔伯深之闡佛削心約志
安子桑之笑歌戰勝體肥被曾參之繻繙嚴嘻啞之戒掉磬
所必懲寬僮媼之失覆羹而輒恕所著有四子書義及詩文
若干卷通平叔之訓詞盍毛兼索薄安仁之納穀布帛是敦
人範經師揚馥鄉術而心殫義府旣損冲襟趾阽焦原終傷
憂患遂遘脾疾告終里寢年六十有八麥麯無效褚幕遽張
痛王烈生前之行應罷相春慰方干身後之魂尙虛賜第嗚
呼哀哉聿有三子森然丈夫學潮學蓮尤噪時譽凡所箸纂
皆親指授貽謀諱復惟以忠恕二言此則顏黃門之庭誥譽

欵猶存晏平仲之楹書胖競自寶者矣兆蓀情聯元季交忝
紀羣修牀下之拜熟聞義聲讀枕中之書備觀法誠誅德之
作誼不當辭忘其歉淺泚淚命筆辭曰

易占素履書稱考成國紀人望惟資典型鴻羽弗用鶴鳴有
聲含真蘊璞身晦道亨先生潛惠鍾美縱總克岐克嶷克振
克竦沿繩手披鐵柵口唪夢爻吞羲執丹隨孔初舞象勻允
升膠庠釋菜肅穆擷芹芬芳文曜膏雉廉徵瘦羊英聲茂實
風從雲翔六月槐花三條樺燭侶逐游鱗詩肄鳴鹿闕異摩
烏袍虛立鵠遼海文章秋風自哭嗚呼哀哉先生之文反真
剗僞先生之質金貞玉粹丹齰屢塵翻骨不媚鹽阪困車天
衢絕轡章甫韋布莽霄桑樞踢壁戢影吟藜著書鑽灼竹素
咬咀道腴操貞蜚遜論倣潛夫通德儻門淹中方駕風成鄒

魯業凌陶謝脆悲秋蒲甘無味蕉季梁謁醫莊生怛化嗚呼哀哉遇儕黔婁謐待展禽禮堂風蕭瑟居雨霪申椒菉蓆歎息彌襟湘水衡山鑒茲苦心嗚呼哀哉元覽洞照蘤光栖臯運蹇而屯報豐可必惄惄才子琅琅辭筆竚昌其門用慰泉室嗚呼哀哉

國子監生陳生妻周氏誄

孺人諱素字契蘭故祠部郎長洲周君約齋女也臨川惠宣之息惇敏蚤聞南陽叱羅之門詩禮夙習玉臺貞氣本具靈源金井微行弗嘗跬步莫銅錢狃之職女師德象之篇淇泉差儻之容蔡國纂組之巧壺德允全嬪則咸仰時同里陳生兆賢以大第之小男屬下達而擇對禮協反馬歡聞射雉孺人下御臧穀上承慈姑董萱免穀之養孝絕勃谿筐筥鍍金

之司敬修享饋姑姆秉教姪娣感仁相夫以德潛於浮榮生
影縷之族羨投畚之軌天桃九華能明其政渝狄七采弗慕
其寵自非秉智上流渺臻斯識已冀序婁易葬華旋萎香無
聚窟悲同姓邱以某年月日小疾長畢年二十有七陳生鬻
歎頽息不能自堪屬爲累旌之詞以紓長簫之痛辭不獲已
藉達其哀乃作誄曰

茂苑土沃葑溪水香光啓令淑誕鍾姬姜瑤光毓秀玉德含
章祥協苕菊節諧瑀璜平津鼎門仲弓賢裔緇袍迎相元端
作儻爾館春桑鱗塍秋枕纖微手區嚦垢心計色柔衿縷獻
儲茝蘭敦牟佐餽芷羹視餐中閨曾閔內主邯鄲汝南方馬
勃海希桓煙視媚行義親恩合結縷心連裁紝響答繫肘囊
芳衛霜嶠疊黛展無風朱開有踰境極欣愉年方華茂晷昃

虞淵候催鐘漏美疹侵肌銀臺翡翠宿亭簷夏凋菖蒲莫邁嗚呼哀哉克修蕡於季蘭兮乏紫草於昌容撤趙瑟與秦簫兮羌泣露而悲松悟人世猶閱水兮倘才嗇而年豐彼擅熾於七德兮早理會乎三空嗚呼哀哉絡緝兮南榮星河兮秋夕感芳菲兮不長撫蕭辰兮繁息睇靈匹兮中宵滴方諸兮皆溢爍電影兮偉惶追昔悰兮標輝鳴呼哀哉境傑俛而不齊兮情昏曠而爽曠或力瘁於辟纏兮或體渾於擊絮繫攻苦而食啖兮有長年而協趣何席泰而履亨兮轉流光之不駐嗚呼哀哉柳園杼塵洛濱月墮玳柙晨局銅蠡晝鎖挺窈填香房冥滅火彤管有煒明徽永播

朱博論

漢朱博遷琅邪太守視事掾史皆移病卧博奮髯抵几曰齊

兒欲以此爲俗耶名見諸吏選其可用者斥罷諸病吏云云
予讀其書而有感焉慨夫淳古遠而法制繁文牘滋而刀筆
重八柄之任百職之權在位擁其虛名豪胥操其實政漢沿
秦弊網密奸萌牛毛之令雖蠲虎冠之徒尙盛卽以文景之
治未革乾沒之風書亞夫之牘背通翁叔之交私由漢而唐
怙權加厲招納賊賂點竄簿書慘急者資爲爪牙懵闇者聽
其文致已往之舊牒歷載之成規或比附以舞文或糾紛以
眩目剛激之長則故反以鈞之明察之師則多歧以誤之支
黨蟠結中外相蒙公狗逆而噬人城狐憑而難去是以破邊
咸之家足以贍軍充滑渙之資可以貴弟以視朱博所怒不
過舒緩養名後之方前罪且什伯白巾出府亦何足稱且博
亦非能正本者也考博與薛宣皆起佐史班書謂宣所在而

治爲世吏師博馳騁進取不師道德卽其罷議曹斥文學薄聖人之言奉三尺之律其懃服豪強張設網絡亦私功曹列掾之故智耳說者謂張湯小吏辨在文深兒寬儒生終明古義欲以府史概易士流或冀愛名不甘汚賤竊以庠序之彥孝秀之流尙有作弊而犯科史言而跖行而謂其典主紙札婆娑公門必無害馬之虞長免餓豺之誚其誰保之哉夫麻人在官三代不廢掌書贊治周禮垂經自難視等虺蛇竟從禽獮誠得冠世之懿幹時之才上者以德感使不忍欺中者以智馭使不能欺下者以威懾使不敢欺則凡案之材寧非棟樑之用而若博者固不足語此也至乃身膺盤帶謬託包荒比匪致傷覆餗自蹈如寧人顧氏所譏甘臨之憂係遯之疾者聞博之風亦當瞿然動哉

劉晏論

嗟乎有唐至肅代之間亦殆哉憚矣戶口亡於安史郡邑據於藩鎮府庫耗竭兵賦滋繁觀乎劉晏之爲轉運使也置遞而權食貨擇士而檢簿書屬官千里如在目前輕重百物制於掌握民蕃息則賦益廣故理財先以愛人私用贍則官物牢故錙銖不屑校計事不留宿場無冗員承給縣官辦集衆務精力機智宏識遠猷言利而無侵牟之嗟裕課而寓惻隱之政轉貧以富反弱爲強休哉何功之偉歟閒嘗上規徃古博稽曩編告窳凋敝之弊不聞於開創之初豐亨豫大之模輒減於中葉以後此非徒盈虛消息時運使然亦人事漸靡以致之也休養久則生齒繁恬熙習則汰心作飲食衣服婚喪酬酢相飾以美相競以奢操業者有定數糜耗者無津涯

當其屢豐尚虞不給一遇災祲卽弗能支於是橐糱之賦大半缺供蠲賑之資頻損左藏又不幸而大兵大役饋餉轉輸度支握算而咨嗟司空仰屋而殄瘁上下交困職此之由於是有桑羊孔僅之輩行頭會箕歛之術法屢變而課乖昔準民益病而歲積逋餘此文侯所以取譬於治治蘇綽所以致歎於張弓也或值寬大之朝恭儉之辟凜過籍之訓懲履畝之非設權宜籌裨助仕擬訾算爵仿武功補苴一時難法千載竊以謂天地之藏不虞其置足國之道在得其人誠使筦榷之任金穀之司悉如晏才悉得晏意將見不弊民而用饑不增法而利溥不斲費而事久不苛細而令行故夫人才者所以濟氣數之窮輓流極之運彼高語周官王制腐儒旣迂而鮮通殫心算詔告緒計臣亦勞而滋害若晏之倫得謂非

求危之良工醫國之善手哉至於廉儉導民浮華草俗下無
嗟不節上益孚惠心則崔實四民之令首課農桑賀琛四事
之陳先糾淫侈責在司牧足正彫流不此之圖而媿爲一切
則在晏前者若宇文融楊慎矜韋堅王鉢之儔在晏後者若
裴延齡李巽程异皇甫鑄之屬秋毫析利竭澤而漁媚貢於
廟堂謗盈於草野覆轍相尋其效可睹矣

徵刻地理書鈔啟

自山海有志岳瀆名經輿地之紀肇端遂古夏書禹貢周官
職方後此圖經本茲譏述漢魏以降記載紛如其總括全域
者則若太康地記十三州志諸書其分載州郡者則若冀州
記并州記諸書至於一山一水宮室都城陵廟墟墓四裔外
域數厥往籍勝秩充盈隋書經籍志陸倕任昉所集凡二百

四十四家外此尙有五十餘家自唐迄今圖史散佚百無一存然經史諸注及唐宋類書秘牒陳編往往散見金谿王仁圃進士鈞稽古籍蒐合殘編凡漢魏以下隋唐以上諸州郡邑山川圖記零星掇拾以類排次先經後緯先綱後目彙集成帙名曰地理書鈔分爲三十餘卷區爲十二門目發凡起例部分井然已佚古書燦然明備旣使陸任之書略還舊觀往代疆域亦有端緒可稽誠考古之鴻圖方輿之寶典也茲將汗竹有待布金用告蘀林斬襄盛舉指上之泉朝集手民之木夕刊庶幾如逢伯益廣珍瑋於寰中不待文淵畫山川於紙上

徵刻宋人詞學四書啟

宋曾端伯樂府雅詞三卷補遺一卷趙立之陽春白雪八卷

外集一卷斥哇去鄭歸於雅音宋代選家此其職志 國朝秀水朱氏編輯詞綜未見二書迨後雅詞鈔自上元世罕傳本趙書淪隱迄未蒐羅幾與謫仙蘭畹之篇同歸澌滅矣倚聲總集古籍旣渺若夫究律呂之微窮分刾之要大晟樂府遺規可稽則白石道人歌曲海叔碧雞漫志而外惟詞源一書爲之總統攷玉田元本上下分編世傳樂府指迷卽其下卷自明陳仲醇續刊秘笈妄析全書之半刪改總序一篇襲用沈伯時指迷之稱移甲就乙由是詞源之名譌爲子目疑誤後學重誣古人慎孰甚焉至於詞韻向少專書紹興二年所刊詞林要韻差爲近古厲太鴻詩欲呼南渡諸公起韻本重雕琢斐軒指此書也以上四種皆倚聲圭臬而承學之士或聞名未睹或以僞亂真秘牒湮沈識者惜之某等搜採宋

刻兼獲舊鈔誠得彙刷流傳固詞林快舉也惟卷帙旣富貲費綦繁雖綴臼之有心懃汗青之無日是用叙述厓略聞諸我儕凡在詞人宜有同志所望各輸赤瓦量助朱提得就新編如聆古樂抗行周雅屏下里之歌謠仿例漢碑列出錢之姓氏

重修太倉州學禮器募疏

蓋聞雞彝龍勺傳饗具於尊罍鼉鼓虬鐘賁樂懸於簾幕矧茲東序西庠之地尤重六瑚八羽之陳有楚表其虔恭有數昭其妥侑邇加豆列彰秩序之無僨玉振金聲卽中和之至教官司於焉釋奠生徒以之習容秩祀所關殷興綦重吾州學校規制釐然百十年來明禋載肅惟歷禩之旣久致禮器之有虧缺滋多凋剝日甚瑤觴繡簾同羽化之銀牷黎磬

霜冕類齒殘之追蠡駿奔何以將事嘉薦何以居欹巾褐均
憂冠纓咸塵屬當郡侯敦崇化本政通人和踵美績於文翁
勵儒風於鮑昱特閔裸懸之壞式崇廢墜之修首發殷情率
先宏願某等忝居橫舍尤切景行是用普告翫林共襄義舉
各量豐約之力敬助營繕之資務俾法物重新隆儀美備成
此邦之要典完齋校之全模禮樂修明觀瞻肅穆後此器歸
典守當書韓勑之碑目前舉出衆擎請勒乙瑛之字

趙味辛六十畫象跋

夫皺觀河之面古佛動其悲愉駐餐玉之顏神仙珍其爪跡
蓋截颶敵火年序更於前過風往綏塵事感於後古之人流
連體貌假託丹青非無故也味辛司馬朱輪之族代無墳僚
赤志之祥少有光譽沙石篆籀奇文見於夢中縷織心詞盛

金起於紙上獻崔駰之四頌賦黃香之九宮筆畫日而雲陵
翼搏風而鳳舉視草烏位宣麻雞樹階翻紅藥自勉九思柱
咒蓮花將成三匝顧以常楊之職出參岑范之班放乎琅邪
觀乎成山鱸香錦秋之亭鶴唳雲門之月著紺而往屏星榮
乎右曹柱笏而吟大風表乎東海此亦素宦之通塗依流之
中品矣無何墜雨驚風解綬釋紱復雁門之踦有待於振翰
著馬卿之書不疲於仰屋恬英耀之沈滯伍僑士以孤飄明
明如月襟期可知蒼蒼在鬚頭顱若此爰乃寓感嵫光鑄顏
行障此六十小象之所由繪也雖然土木之形倣同欺魄文
字之壽貞於吉金司馬辭鋒筆陣玉軌金羈奇致元風煊赫
飛走豈在假長康之手方足傳神寫殷雋之真始當留面哉
徃躅可紀來軌方脩異時入洛社之圖和子山之句聲聞者

耆雪刺霜顛猶待濡毫斯其嚆矢

先府君事畧

府君姓彭氏諱禮字行之又字蘭階江蘇太倉州鎮洋人也先世出於五代吉州刺史玕公後由廬陵遷泰和月池又遷茶陵衡山至六世祖肅清公始遷於歙曾祖元輝公諱學明祖廷玉公諱正遠由歙遷太倉之新塘市幼育於舅吳氏因以爲姓至府君通籍後復之考夔聲公諱鳳韶兩代皆以府君貴贈文林郎祖妣汪氏妣許氏皆贈孺人府君幼誠篤嗜學自肅清公以來世以文學耆德著稱家多藏書研閱殆徧補州庠生旋食餼舉乾隆癸酉鄉試甲戌中明通榜例可得內閣中書而府君素恬祿仕又得夔聲公書謂勿亟進取卽東裝歸侍養乾隆丙戌成進士選授山西寧武縣知縣地處

雁門極邊風俗鄙俚好以小忿相鬥訟府君至首進庠序之士勗以力行勤學復擇其尤者親教之俾訓其邑人於是人敦敬讓訴然知學問之可慕而向時囂競之風寢以衰息每日凌晨起坐堂皇治事訟者先開誠勸諭不輕加鞭朴嘗曰人當養其恥心一予杖卽不得爲完人恐其後之輕於抵法也顧於縣中豪猾惡稔者輒捕治痛繩之不少貸有婦以姦殺其夫詭爲自經鄉里已結報府君反覆研訊得其情竇之於法寧武俗祀貓鬼其畫象貓首而人身男女僕侍閒能爲祟於民間爭相禱祠巫者緣以爲利府君聞拘衆巫至盡搜其畫象而焚之城隍神前械衆巫於衢出告諭嚴禁風遂革某甲毆其父重傷繼又毆斃從父議者以爲例當上請府君曰此元惡何得以時日稽誅立召而杖殺之乃具狀以聞上

官才府君之斷不之罪也時巡撫農起公素以仁廉稱嘗謂僚屬曰古有以經術飾吏事又曰猛以濟寬若彭令者殆兼之矣將薦爲州牧會病卒不果府君賦性恬退不與人競榮利始履任卽獲鄰境越獄盜犯部議加一級及是以資格當擢官而自顧年已衰遂引疾力辭以去去官日士民泣送將抵太原有越三百里而以壺殮饋於道旁者則邑之鄉老人也旣歸貧甚不能自存復請以校官用選潁州府教授留不孝兆荃治家事而命不孝兆蓀隨任府君素康強無疾今秋不孝兆蓀歸偕不孝兆荃爲先祖妣營窀穸事竣過吳門以病留滯者越月病愈馳至潁州則府君以痢疾臥牀旬日矣不孝兆蓀方幸得侍奉醫藥冀疾漸起而甫越宿府君遽捐館舍時乾隆五十八年十二月二十四日也嗚呼痛哉嗚呼

痛哉不孝兆荃既遠在千里外而不孝兆蓀侍疾無狀驟罹
酷罰呼捨莫拯生無以爲養歿復不能慎其終不人不子尙
何顏偷息人世旦夕苟生耶所以不敢卽死者徒以府君性
情學行世不克盡知不及今詮次厓畧將淹没而無以考其
實是不孝等之罪戾滋大也嗚呼痛哉府君至孝純篤事考
妣不僅以服勞奉養爲盡職事無鉅細必先意承旨得歡心
而後卽安家僅中資而振貸族鄰周恤鄰里歲入不足供往
往稱責以濟晚年家日落逋券盈積然固未嘗絲毫以自奉
糜也生平無疾言遽容溫然眸然望而知爲仁人君子於學
無所不窺尤研精於六經三史及宋五子之書閔舉業家之
挾兔園冊因仍固陋以應有司之策試故於杜氏通典馬氏
通考各書率皆羅絡編纂洽孰如指諸掌當謁選在京時日

取諸史中循吏傳手自鈔撮彙成卷帙或謂古今異宜府君曰法古人者貴師其意不泥其跡要非先究其事跡則古人之意亦不得而窺且古今同此理耳安在古法之不可施於今耶之官日同年朱學士竹君丈贈詩云子學甚醇正子貌頗古雅去作親民官神真跡乃假而香涇蔣丈宰馬邑亦贈詩云入境民盡肥視君彌老瘦蓋紀實也府君接人寬和不爲矯廉自飾而非義所干則必嚴絕之嘗充鄉試同考試官鄰邑巨室欲有所屬請至門闈者斥弗與通蓋府君之信孚於僕隸者如此府君生於康熙五十六年七月二十七日年七十有六娶滑孺人外祖父苑祥公爲沈文愍公高第弟子選拔貢生官雲南鹽場大使子三長不孝兆荃次不孝兆蓀生母蔡氏外祖父太學生能一公以才藝聞於時著有

雅樂精義母氏實能盡傳其學先府君卒幼兆蕙庶母洪氏生甫四齡而府君棄養矣嗚呼痛哉女二人一適同邑徐氏一適吳門沈氏孫二人觀寶觀佑府君於文章外尤好詩歌著金臺倡和集比窗吟橐諸種而性謙下不欲以問世常勗不孝等以庸行闇修勿事表襮於外臨終遺令毋作行狀以爲人求無愧於心則已耳區區飭躬砥行當官治理皆士人分內事何足當紀述耶嗚呼痛哉府君之志業蓋可知矣踰月不孝兆荃奔喪至苦由泣血中語不孝兆蓀曰我父雖有遺言而我與汝竟聽潛德之弗彰不幾再死我父耶我心氣衰耗汝其就聞見所及者陳述大畧藏諸篋以俟有蓄道德能文章之執友跼求銘幽之文稍不孝等椎心之疚我父之靈當不汝責也是以含血吮筆挂一漏萬語無倫次仍遵

遺令不敢稱行述伏冀當代大賢長者哀其荒迷恕而教之
則不孝等世子孫感且不朽

府君墓誌銘見王蘭泉先生春融堂集中閒叙家世處爲
鈔胥漏落未經校正謹記於此

兆蓀敬識

小謨觴館文集卷四

文集跋

儻偶之文運意遺辭與古文不異椎輪旣遠源派益歧悼先
秦之不復則弊罪齊梁陋駢格之無章則首功蕭李自是而
降殊用异施判若淄澠辨同涇渭嗟夫臨頽劍器曲舞公孫
河陽豬目案參荆國不有子美子瞻孰辨其波瀾之莫二妙
諦之無上哉高文典冊漢用相如韓碑柳雅集言鴻苑咸能
鏤介邱之泥鑄燕然之石亦可知自命作家奄有百禩必無
有專執記序小文陰何雜響以懲羹吹釐是丹非素者矣唐
人號稱孰精選理崇賢之業冠時獨出珠囊金鏡哲匠挺生
驅染煙墨搖襞紙札雖復文章淺言不拘糟粕而當其卓然
合作猶足書之萬本入人肝脾又况穎達序經房喬論史貞
元之詔會昌之集鴻筆鉅製包贏越劉者乎甘亭先生小謨

觴館文集鬱律沈雄陽開陰闔俯蹈宗軌仰稽前則鴻序兼
於衆體謚議美於碎金誄掩安仁書休曹植論屈靈運王衡
銘奪陸倕班掾遠思前比矯矯西京自王筠舊手蕭愷才子
方茲蔑矣又昔人恨仲文讀書未半袁豹先生則器辨服匿
字析凡將校讎落葉無慙中壘經田擷秀不讓康成洵所云
異人間出今日始見者歟東樹世傳經術肄業無忘追尋平
生頗好詞藻而學步知慙翬眉自恥雖經殷侯之譚屢被陳
王之誚高文載覲傾佇何如堂下礪明未能默息豈謂一
商榷解讀郊居類彼汝南論茲月日也哉桐城方東樹跋